

Dañando Bo Nòmber

Bo nòmber ta sumamente importante! Mi'n ta papia di un nòmber (Linchi òf José) ni di un fam. Mi ta papia di e imagen mental ku nos komunitat tin di bo persona. Mi ta papia di e karakteristika pa kua bo ta konosí. Un hende por ta konosí pa su onestidat, un otro komo un bon trahadó, i e di tres persona ta konosí pa su mal beis. Pues, ora nos ta bisa un persona tin un “bon nòmber” òf “mal nòmber” nos ta papia di su reputashon.

Kiko ta determiná bo reputashon? **Den mayoria kaso, ta bo mes komportashon, palabranan òf aktitut!** Kon “lenga largu” ta bira bo reputashon? Dor di papia di mas. Un hende ku tin su kasa + amante, lo no tin e nòmber “moral”. Algun hende ta konosí komo generoso—pasobra nan tin hábito di duna.

Nos ta asina lihé pa akusá hende di dañá nos nòmber. Ma hopi biaha, e akusado no ta hopi leu... **djis wak den spil!** Si bo ta gaña pa saka kurpa, kon ta pusíbel pa bo ta konosí komo un hende onesto? No keda strañá ku hende ta hañábo irresponsabel si bo ta buta‘bou sin kaba ku bo tarea. Ora bo ta papia konstant di bo mes i bo lógronan, otro hende no ta dañá bo nòmber ora nan ta yamábo “orguyoso” tras di bo lomba. **Mayoria biaha, ningun hende ta dañá bo nòmber mas ku bo mes!**

Palabra di Dios ta bisa, “*Un bon nòmber ta mas di deseá ku gran rikesa...*” (Proverbionan 22:1). Un bon reputashon ta algu sumamente balioso. **Hasi máksimo esfuerso pa biba di tal forma ku bo por mantené un bon reputashon. Esei ta e mihó protekshon kontra akusashonnan ku por dañá bo nòmber!**

Tin ora hende (pa malu òf den ignoransia) ta dañá bo reputashon maske bo ta inosente. Kon bo ta reakshoná? Bo ta fulminá i sapatía? Bo ta bai radio, korant òf dilanti mesa bèrdè? Bo ta konta henter mundu kon fulano tal i tal a dañá bo nòmber.

Nos tin impreshon ku nos tin ku hasi máksimo esfuerso pa protehá nos reputashon. Tin ora esei por ta na su lugá. Ma tantu biaha, bo esfuersonan no ta yuda! **Hopi biaha bo ta gasta bo rosea pornada purbando pa konvensé hende di bo inosensia. Ma nan tòg lo pensa loke nan ke pensa!**

Kiko bo mester hasi ora hende ta dañá bo nòmber? 1) For di awor, sòru ku bo ta **biba di tal forma ku hende lo no kere e akusashon falsu.** 2) Evaluá ki bèrdat por tin den e akusashon. Si e akusashon ta bèrdat, atmití esei, pidí pordon di esnan konserní, i kambia. 3) Studia bon si defensa propio ta na su lugá. 4) Si e kontesta ta “nò”, si bo a konfia Hesu-Kristo so pa salbashon i ta biba pa agrad’E, bo por keda trankil, sabiendo ku DIOS SA I E MES LO DEFENDÉBO. Dios ta bisa, “*..di Mi vengansa ta, Ami lo paga bèk...*” (Romanonan 12:19). Ademas, Beibel ta bisa, “*Ma e bereha (kaminda) di e hustu ta manera lus di ourora, ku ta briya mas i mas te ora ku bira di dia kla*” (Proverbionan 4:18). **Tempran òf lat bo hustisia lo sali na kla.**

Ma nos ta impasiente. Nos ke pa Dios defendé nos awor; pa sera nan boka awor! Nos ke sa nos tin ku yuda Dios. Nos ta defendé nos mes serka tur hende...si nan ke skucha si òf nò! **Ma ora bo ta defendé bo mes reputashon, Dios no ta hasié mas pa bo!** Bo simpelmente tin ku warda trankil pa Dios Su tempu. Mientras tantu, sigui konfia Dios, maske bo ta kana den skuridat i tin bèrgwensa pa motibu di loke hende ta papia i pensa di bo.

I no lubidá ku hende tambe a purba dañá nòmber di Hesus! Nan a yam’E “*...hòmber golos, i un buraché, un amigu di publikano i pekadó*” (Mateo 11:19). I pió ainda, nan a insult’E ku e palabranan “*...Bo ta un samaritano i..bo tin un demoño*” (Juan 8:48). Nan a krusifik’E komo un kriminal. Apesar di tur esei, awe e nòmber Hesus ta un nòmber onrá i stimá!

Bo nòmber ta masha importante! Tin ora bo no por yuda ku hende ta dañá bo reputashon. Ma di otro banda, sòru pa komportábo di tal forma ku no ta bo mes ta dañá bo nòmber.